



SAOPĆENJE ZA JAVNOST

2. SEPTEMBAR 2021.

Tužilaštvo dokazalo optužbe

118 godina za otmicu i ubistvo Edina Zejčirovića

Tužilaštvo Brčko distrikta BiH dokazalo je optužbe protiv Suana Halilovića*, Samida Šabanovića*, Nihada Hukića* i Suvada Djedovića* optuženih za otmicu i svirepo ubistvo Edina Zejčirovića. Za teško ubistvo, kojem su prethodili otmica te agresivno i bezobzirno mučenje žrtve, oni su danas pred Osnovnim sudom Distrikta nepravosnažno osuđeni na ukupno 118 godina. Jedinstvene kazne dugotrajnog zatvora izrečene su Haliloviću (36 godina), Hukiću (32 godine) i Djedoviću (30 godina). Optuženom Šabanoviću, koji u vrijeme izvršenja krivičnih djela nije imao godine života potrebne za izricanje dugotrajnog zatvora, sud je izrekao jedinstvenu kaznu zatvora od 20 godina.

Optužnicu protiv njih Tužilaštvo Distrikta podiglo je 8. maja 2020. godine optuživši ih da su 17. novembra 2019. godine, po prethodnom dogovoru, a nakon što ih je prvooptuženi okupio, oteli i potom do smrti pretukli i mučili Edina Zejčirovića. Kako je navedeno u optužnici, njega je Djedović najprije telefonom pozvao u ugostiteljski objekat *Stela*, gdje su ga namamili u vozilo Halilovića, a potom ga vozeći po gradu udarali tražeći da prvooptuženom vrati dug od oko dvije hiljade KM. Zaustavivši se na obali rijeke Save kod naselja Vučilovac, oštećenog su izvukli iz vozila na nasip i zajedno nogama i pesnicama udarali po tijelu i glavi, usljed čega se skotrljao sa nasipa. Šutirajući ga, gazeći i sve to naizmjenično snimajući telefonskim aparatom oštećenog su nastavili udarati da bi ga drugooptuženi šutirajući u glavu bacio u Savu. Pošto ga je Djedović izvukao iz vode, žrtvu su nastavili mučiti - Hukić udarcima elektrošokerom u glavu, Halilović pritiskanjem prsta šake kombinirkama i uriniranjem po njegovom ležećem tijelu, a Šabanović udarcima nogu i ponovim bacanjem u rijeku, nakon čega su se vozilom udaljili ostavivši bespomoćnu žrtvu da se utopi - zaključeno je u optužnici ([link na optužnicu](#)). U postupku protiv optuženih utvrđeno je da bi oštećeni preminuo već usljed nanesenih povreda i u slučaju blagovremene ljekarske intervencije.

Tokom suđenja Tužilaštvo je isticalo da je usljed brojnosti nanesenih povreda Edin trpio jake fizičke bolove, te da je konstantno imao strah visokog intenziteta uz osjećaj životne ugroženosti. Ukazavši na upornost izvršilaca u počinjenju krivičnog djela i njihovu bezobzornost i agresivnost koja se ogledala i u ponižavajućem ponašanju prema žrtvi, prvenstveno od strane Halilovića, Tužilaštvo je zatražilo izricanje kazni dugotrajnog zatvora za njega, Hukića i Djedovića. Za Šabanovića koji u vrijeme izvršenja krivičnih djela nije imao dvadeset jednu godinu života, Tužilaštvo je zatražilo izricanje zatvorske kazne u visini zakonskog maksimuma od dvadeset godina. Ocijenivši dokazanim njihovu krivicu, sud ih je po Krivičnom zakonu Distrikta nepravosnažno osudio za krivična djela otmice, počinjeno u sastavu grupe (*iz člana 177 stav (2)*), i ubistva - na svirep način (*iz člana 163 stav (2) tačka 1)*). Jednako kao i Tužilaštvo, optuženi presudu mogu pobijati žalbom. O izjavljivanju žalbe, Tužilaštvo Brčko distrikta BiH odlučit će po prijemu pisanog otpravka prvostepene presude.

*Preduzimanje radnji krivičnog gonjenja prema određenoj osobi ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.

GLAVNI TUŽILAC
ZEKERIJA MUJKANović

**INFOGRAFIKA: KRIVIČNA
DJELA I IZREČENE KAZNE**

OPTUŽENI	UTVRĐENE POJEDINAČNE KAZNE (GODINE)		IZREČENA JEDINSTVENA KAZNA (GODINE)
	UBISTVO	OTMICA	
SUAN HALILOVIĆ	35	3	36
NIHAD HUKIĆ	30	3	32
SUVAD DJEDOVIĆ	28	3	30
SAMID ŠABANOVIĆ	18	3	20
UKUPNO	111	12	118